

DNPCK DESIMINA INFORMASAUN BA LIDERANSA KOMUNITARIA NO KOMUNIDADE

Dili-Diresaun Nasional Prevensaun Konfliktu Komunitária (DNPCK) iha kinta feira (23/05/19) ne'e hala'o programa Edukasaun Sivika hodi fahe informasaun kona-ba "Prevensaun no Rezolusaun Konfliktu, Papel DNPCK, Perigu Konsumu Drogas, Tráfiku Umanu, Lei Armas Brancas, Étika Morál no Reflesaun Espirituál ", ba lideransa komunitária, juventude no comunidade sira iha suku foun Ailok, Postu Administrativu Kristo Rei. Programa ne'e realiza durante loron ida, iha sede suku Ailok ne'ebé



ofisialmente loke hosi Administradór Postu Administrativu Kristo Rei, Sr. Gaspar da Silva akompaña hosi Diretora DNPCK, Sra. Lidia Lopes de Carvalho, Xefe Departamentu Prevensaun Konfliktu (DPK), Sr. Martinho Carvalho Sarmiento, Xefe Departamentu Polisia Komunitária, Superientendente Asistente Polisia, Sr. António da Luz. Diretora DNPCK Sra. Lidia Lopes de Carvalho representa S.E. SEPS agradece ba autoridade lokál no partisipante sira ne'ebé fó ona tempu hodi partisipa iha programa edukasaun sivika ne'ebé organiza hosi DNPCK no RNPK liuhusi kordenasaun serbisu hamutuk ho lideransa komunitária suku Ailok nian. Direjente ne'e esplika katak "DNPCK tutela iha Sekretáriu Estadu Protesaun Sivil ninia serbisu mak atu halibur informasaun kona-ba sinais konfliktu ne'ebé akontese iha comunidade sira-nia le'et. Serbisu ida ne'e ami hala'o dezde tinan 2008 to'o agora. Iha eventu ida ne'e Diresaun konsidera nesesáriu hodi halo edukasaun sivika ba ita-nia juventude sira iha suku Ailok". Sra. Lidia husu ba partisipante liu-liu juventude sira atu partisipa to'o rohan, atu nune'e bele hetan matéria importante hosi oradór sira hodi kontinua hatutan fali ba juventude sira seluk ne'ebé la partisipa iha programa ida ne'e. Iha okaziaun ne'e, Administradór Postu Administrativu Kristo Rei, Sr. Gaspar da Silva iha abertura hateten "maioria juventude sira gosta mete problema maibé sira seidak hatene saida mak problema, bainhira akontese ona no afeita ona ba sira-nia an foin hakfodak. Tanba ida ne'e mak DNPCK mai atu fó hanoin fila fali ba ita bele komprende saida mak problema no problema ne'e mak saida. Diresaun ne'e mai atu fahe informasaun ho koñesiementu kona-ba prevensaun konfliktu no lei sira atu bele ita evita an hosi problema ne'ebé fó impaktu ladiak ba relasaun moris ema nian". Xefe Departamentu Polisia Komunitária, Superientendente Asistente Polisia, Sr. António da Luz agradece mós "ba DNPCK ne'ebé realiza eventu ida ne'e. Eventu ne'e la'os foin mak halo tinan-tinan kuaza halo beibeik iha suku no eskola, ne'ebé envolve mós PNTL hodi fahe informasaun balun relevante ho situasaun iha rai laran, nomós fahe informasaun kona-ba ita-nia lalaok ita ema nian liu-liu oan joven sira iha bairu, eskola no fatin ne'ebé deit. Ha'u naoin ita partilla informasaun ba malu hodi ita komprende no hatutan ba maluk seluk tanba edukasaun sivika ne'e buat importante". Fasilitadór matéria iha atividade ne'e Xefe Departamentu Rezolusaun Konfliktu (DRK), Sr. Julião Fernandes, Padre Niko hosi DEJUKDIL, Inspetór Polisia, Sr. Domingos Gama hosi Gabinete Juridiku PNTL.*CM*